

REGIONAL NEWS

HEADLINES:-

1. Political party hrang hrangin Lok Sabha inthlan Campaign bei chho zelin ro rel lai ZPM pawhin vawiin khan inthlan campaign bul an òan.
2. Chief Minister Pu Lalduhawma'n sorkar tangka kum 2023-2024 buaina awm lova khar fel a ni chu lawmawm a tih thu leh sum ren leh daihzai taka hman a ngaih thu a sawi.
3. Prime Minister Narendra Modia chuan khawvel thil thlengin ram a nghawng nat loh nan kum 10 lo awm tur chhungin eibar zawnaah ram a intodelh a tul a ti.
4. Delhi Court chuan Delhi Chief Minister leh Aam Aadmi Party leader Arvind Kejriwal chu tun thla ni 15 thleng judicial custody a awm turin a ti.

<><><>

ZPM CAMPAIGN KICKOFF

Zoram People's Movement chuan vawiin khan Lok Sabha inthlan campaign bul an òan a, ZPM Leader, Chief Minister Pu Lalduhoma chuan hnam leh sakhaw tana him chin zelah sawrkar laipui òa taka thawhpui an tum tih a sawi.

ZPM Party-in Vanapa Hall-a Lok Sabha Election campaign beihpui thlak tannaah hian ZPM President Pu Lalliansawta chuan a khuh a hawng a, hun hmanpuitu Chief Minister Pu Lalduhoma chuan Mizoram Legislative Assembly-a MLA nei party zingah ZPM chiah chu Central-a òan lam nei lo an ni tih a sawi a; hetihlai hian Central chu sum leh pai mamawh petu ber an nih avangin biak chhiat an tum loh thu sawiin hnam leh sakhaw tana him chin zelah thawhpuiin òat leh òata inlawm tawn an tum a ni, a ti.

ZPM MP Candidate Pu Richard Vanlalmangaiha pawhin thu sawiin ZPM Party chu Mizoram mipuiten enchhin an tum lova, en tak tak an tum a ni, a ti a. Sawrkar laipui leh state sawrkar pahnih inkara thawk tur a nih angin leilawn nget tak nih a tum, a ti a. State budget-ah hmasawna hnathawhna tur a tlem avangin project leh scheme a tam thei ang ber sawrkar laipui atangin hai chhuah a tum tur thu a sawi a. Zo hnahthlak zawng zawng MP nih a tum thu leh an harsatna leh manganna an thlen theihna turin an tan a inhawng reng dawn tih a sawi baw.

<><><>

CONGRESS DEMOCRACY RALLY

Mizoram Pradesh Congress Committee (MPCC) chuan vawiin khan India ram Democracy chhanna Rally Aizawlah an huaihawt.

MPCC Campaign Committee huaihawta India ram Democracy chhanna rally hi Aizawl Israel Point-ah neih a ni a, he huna thusawitu MPCC Vice President Pu Lalnunmawia Chuaungo chuan India ram democracy chu chhanchhuah a ngai a, Mizoram MP pakhat a thlan turah pawh BJP dodal thei tur Congress candidate Pu Lalbiakzama thlan a ngai niin a sawi.

Pu Lalnunmawia Chuaungo chuan BJP Sawrkar hnuaiah ralmuang tak leh dik takin inthlanna neih theih a ni dawn lo nia sawiin MP inthlan lo awm tur pawh dik lo taka hmachhawnpui a tum mek, a ti a. India ram mipuite laka firfiak taka Hindu chawinun tumtu RSS leh HP-te leh an political party BJP te chu Hindu tam zawkin an duh lo a, loneitu pawl hrang hrang te pawh BJP lakah an lungawi lova an beidawng tih sawiin BJP sawrkar pah thla theitu chu eptu tangrual INDIA te an nih thu leh dik lo takin BJP chuan campaign thei loin an hruaitute Bank account an hrensak, a ti a. Delhi CM Arvind Kejriwal lakah pawh dan an hmang sual nasa tih sawiin Court-ah thiam a chang ngei dawn, an ti baw.

<><><>

BJP PRESIDENT PRESS MEET

Mizoram BJP President Pu Vanlalhmuaka'n Mizoram sawrkar Pu Lalduhoma kaihhruiin Central sawrkar an dawr hlawhtling lo hle tih mipuite'n an hria, a ti.

He thu hi vawiina Aizawl Press Club-a Press Conference-ah sawiin Pu Vanlalhmuaka chuan Chief Minister Pu Lalduhoma leh a thawhpuiten sawrkar laipui an dawrin an hlawhtling lo hle a, khumbeu leh Mizo puan chi hrang hrang pea thla an lakpui chu an thlen san ber a ni, a ti.

BJP President chuan state inthlanah BJP chu ar chuk tui lo khawpin sawichhiat a ni a, BJP inhlauh siaknain vote zawn thin a ni tih sawiin Mizo mipuite chuan hmasawn an duh chuan an fin thiam a tul, a ti.

Pu Vanlalhmuaka chuan sawrkar laipuia BJP hotute nen an inhmuhin Lok Sabha member-ah thlan tlin a nih chuan Mizoram hmasawna tur lian tam tak sawrkar laipuiin an tihsak dawn, a ti a. Hmarchhak state-ah State President MP inthlana ding awmchhun a ni tih sawiin thlan tlin a nih chuan Central Minister a ni thei dawn, a ti a. Lok Sabha MP pakhatin Central sawrkar do a hlawk loh zia hrechiantu chu MNF Predident Pu Zoramthanga leh a thawhpuite an nih thu a sawi, a ti a. BJP leh Hindu sawizawm chu party dangho au hla ber a ni tih sawiin Kristian Minister a awm theih nan amah vote tling turin mipuite a ngen a ni.

Pu Vanlalhmuaka chuan thlan tlin a nih chuan PM Scheme hrang hrang mipuiten tangkai zawka an hman theih nan hma a la dawn, a ti a. Mizoram BJP chuan hmasawna chu an ngaih pawimawh ber a ni tih sawiin Mizoram hmasawna chu sawrkar laipuia hotuten an tiam, a ti bawk a. State sawrkar Pu Lalduhoma kaihhruiin Central-ah engmah sawi chhuah an nei thei lo, a ti a; a zin hawa Press Conference-ah pawh hmasawna tur an sawi chu hun hmasa lama hmalakna hlawhtlinna chauh a ni tih sawiin an zinna hlawhchham lanna chu ZMC-ah a chiang tih a sawi bawk.

<><><>

CM LALDUHOMA

Chief Minister Pu Lalduhawma'n nimin khan Aizawl Treasury tlawhin, sorkar tangka kum 2023-2024, buaina awm lova khar fel a ni chu lawmawm a tih thu leh sum ren leh daihzai taka hman a ngaih thu a sawi.

Chief Minister hian sorkar tangka kum, kum 2023-2024 Financial Year ni tawp ber nimin khan Aizawl North Treasury leh South Treasury tlawhin, Aizawl Treasury hnathawh dan a enfiah a, harsatna leh buaina awm lova tangka kum tha taka khar fel a ni chu lawmawm a tih thu a sawi a, sum neih ang angte ren tak chung leh daihzai taka hman a ngai, a ti a. Treasury-a thawke thawhrimna fakawm a tih thu a sawi bawk.

Chief Minister hi Pu Vanlalfaka, Treasury Officer, Aizawl North Treasury chuan a lo dawngsawng a. Chief Minister hi Adviser to CM (Finance) Pu TBC Lalvenchhunga, Principle Secretary Finance, Pu Vanlalchhuanga; Finance Secretary, Pu Lalthansanga leh Chief Controller of Account Pu Vanlalsawma ten an tawiam a ni.

<><><>

PAVALAI CONF. PANDAL

Nimina ruah leh thli thawkin a len chhiat state pum huap Presbyterian Kohhran Pavalai Pawl intawhkhawmna tur East Lungdar-a Pandal sak that hna chu vawiin atang khan East Lungdar khawtlangin an thawk.

Tun thla ni 12 atanga ni 14 chhunga Mizoram pum huap Presbyterian Kohhran Pavalai Pawl intawhkhawm neihna tur East Lungdar tlanga Pandal sak that hnatlangah hian mi 800 vel an thawk chhuak a; pandal tlu hi senghawi fel thawkhatin a thar tur ruhrel engemawzat an tung hman. Pandal tlu chhia vanga sum hloh zat hi Cheng Nuai 15 vel a nih thu a huaihawttute chuan an sawi a. Pavalai Intawhkhawm hi a hun leh hmun ngaia neih theih turin chhun zan zawma Pandal sak hna thawh an tum a ni.

Hrangturzo bialtu MLA Pu Lalmuanpuia Punte chuan vawiin khan Pandal sak lai chhe ta hi a hmunah tlawhin thil tul hrang hrang a sawipui a, zanin hian Organising Committee hruaitute nen an sawiho zui dawn a ni.

<><><>

FIRE PREVENTION

Aizawl District-a kangmei ven kawnga hma latu - District Level Committee on Fire Prevention chu vawiin khan an thukhawm.

Kangmei chhuak thei ven kawnga hmalakna te thlirletna thukhawm hi Aizawl District Bawrsap Pi Nazuk Kumar chuan a kaihruai a. He hunah hian Aizawl District chhunga Kangmei chhuak tur ven kawnga hmalakna report tlangpui Aizawl Forest Division DDO leh Member Secretary ni bawk Pu Lalnundanga Khawlhing hnen atangin ngaihthlak a ni.

Report-in a tarlan dan chuan kum 2024 kumtir leh tun inkarah Kangmei chhuak vawi 308 chhinchhiah niin heng Kangmei chhuak hian ram hectare 498.61 a tuam a. Lo hal hun tur ruatah thingtlang khua ten lo an hal deuh vek a, Khawpuar chiahin lo hal hun bituk pelah lo an hal a. He dan bawhchhiatna chungchangah hmalak dan tur pawh rel ho nghal a ni.

Aizawl Bawrsap chuan Kangmei chhuak tur ven kawnga mipui zirtirna kalpui chu a tha thawkhatah a ngaih thu sawiin tan lak chhunzawm erawh a ngaih thu a sawi. He hmalakna pawimawh takah hian line department te pawh thawhhona tha an neih chhunzawm a pawimawh tih a sawi a. Thingtlanga ram kang venhim kawngah hmalakna kalpui ang thovin AMC huam chhungah pawh he hmalakna pawimawh tak hi chak zawka kalpui a ngai tih a sawi bawk.

<><><>

ELECTION DUTY PASSED AWAY

Mizorama Lok Sabha MP inthlana duty zinga mi 2nd IR Battalion, Khawzawl atanga Saituala tun hnaia kal Havildar F. Zosia, kum 54 chu tukin khan Saitual Damdawi Inah a thi.

F. Zosia-te hi Saitual DC Office hluiah an inkulh a, thawk lamah harsatna a neih avangin tukin khan Damdawi Inah hruai a ni a. Damdawi In thlenpui a nih hnuah a thi. F. Zosia hi Ailawng khaw chhuak a ni a, mahse vawiin khan hun eng emaw chen a fate nena an chen tawhna Khawzawla panpui nghal niin vawiin tlai khan vui liam a ni.

<><><>

PM ON RBI

Prime Minister Narendra Modia chuan khawvel thil thlengin ram a nghawng nat loh nan kum 10 lo awm tur chhungin eibar zawnaah ram a intodelh a tul a ti. Vawiina Reserve Bank of India kum 90 tlin lawmna Mumbai-a neihah he thu hi sawiin Pu Modia chuan Indian banking sector hmasawn dan chu zir tham a ni a ti a. A kaihruai sawrkar hmalakna avangin bank ten hma an sawn nasa tih sawiin kum 10 chhungin RBI pawhin hma a sawn a ni a ti. RBI kum 90 tlin lawmnaah hian Union Finance Minister Nirmala Sitharaman leh Union Ministers of State for Finance Bhagwat Kishanrao Karad leh Pankaj Chaudhary te pawh an tel a ni.

<><><>

DELHI CM

Delhi Court chuan Delhi Chief Minister leh Aam Aadmi Party leader Arvind Khejriwal chu tun thla ni 15 thleng judicial custody a awm turin a ti. Pu Khejriwal-a hi liquor policy scam ah sum chhehrelh thubuui avanga man a ni a. Tun thla ni 21 khan Enforcement Directorate (ED) ten an amn a. ED te kuta a awm theih hun chhung a tawp hnuah vawiin khan rouse Avenue Court -a Special CBI judge Kaveri Baweja chuan Pu Khejriwal-a hi ED te kuta awm chhunzawm turin a rel a ni.

<><><>

UNION HOME SECY.

Union Home Secretary Ajay Kumar Bhalla chuan tunlai technology thar avang hian venhimna lamah chona thar a siam dawn a ti.

Vawiina Bureau of Civil Aviation Services (BCAS)dincham vawi 38-naah he thu hi sawin Pu Bhalla chuan technology thar Artificial Intelligence (AI), Global Positioning System(GPS) jamming, drone leh internet lama sualna hrang hrangte hian harsatna a siam chho mek a ti a.

Technology thar hmang tangkai BCAS chu intuaithar tur leh theihtawp chhuaha venhimna lama tan la turin a sawm a ni. Aviation sector lamah ramin hmasawna chak tak a nei mek tih sawiin kuminah pawh kum dang aia nasain a thang dawn a ti a. Hmasawna ruhrel indin chhoh mekte hian venhimna lam a nghawng chhiat loh nan hmalak a ni a ti bawk.

<><><>